

Funziuns en onú de Sant Ujöp Freinademetz a Oies

- en dedolönesc ai 28 de iener:
ales 20:00 devoziun en onú de Sant Ujöp da Oies (♫ *Cor de dlijia da Lungiarü*)
- en dedemesaledema ai 29 de iener:
ales 16:00 **santa messa solena** (♫ *Cuartet Göma*)
ales 20:00 **santa messa** (♫ *Cor de dlijia da La Val*)

Vita de ploania y de paisc

- o **Iolan y Dio s'al páii dles ofertes en recort de † Hermann Ploner**: fam. Rigo Alnei, fam. Paola Ploner y fioc, fam. Herbert Erlacher, fam. Angelo Rigo, fam. Marta y Hubert Ploner, fredesc y sorus Daverda, fioc Antenhofer, lauranc dal boca d'Al Plan, chi dal iat dla nei, fam. Ploner Georg, Lois Kastlunger, Eduard Rovara, Mateo, Stefan y Renate Ties, Ursula Sieder y Konrad, fam. Ploner/Corterei, le Teater La Pli. Dötes cöstes spenores ven partides sö danter la Krebshilfe, la dlijia, le Vinzenzverein y i Stödäfüs. Emplü él ciamo gnü paié santes messes.
- o **Ofertes** - tal pröm mez ann 2020 **mess gní menades demez** cöstes ofertes:
15.03. patronat ALCI-KVW **19.04.** fonds de solidarieté dal clero
22.03. Kassian-Tschiederer Werk **26.04.** l'Università Catolica de Milan
10.04. oferta de Carsema "Misereor" **28.06.** obolo de San Pire
Dötes les atres romagn ala dlijia.
- **Consei de Formaziun**: en **jöbia, ai 23 de iener**, ales 20:00, vegnel tigní te Ciasa dles Uniuns la **sontada generala**. Düc i rapresentanc dles uniuns y chi co é interessés ala formaziun personala, é der bel enviés.

1 enformaziuns y termins

Ciasa de Palsa: l'aministraziun dla Ciasa de Palsa lascia alessi che al ven scrit fora 4 posc de laur por infermiera diplomada a tomp parzial (50%), 1 n post por infermiera diplomada a tomp parzial (63,16%), 2 posc por infermiere diplomada a tomp plen, dla cualifica funziunala VII. ter con le prozedimont de mobilité danter enc. Düc i posc é reservés al grup linguistich ladin. Enformaziun al ☎ 0474 524786.

Comun de Mareo: i sac dal ciomont ven endô partís fora por döt l'ann, porchel é düc bel enviés da passé te comun anter le mens de iener a tó i sac por l'ann 2020, dertan les ores d'ofize. Al é ince la poscibilité da i prenoté por telefon, ☎ 0474 503760 o por e-mail a margareth.rubatscher@comun.mareo.bz.it Sce zacai n'ess spo massa püc, nen ciararai samben ince ciamó ia por l'ann.

Döt le bun a:	Sr. Edith, Anna Erlacher, <i>Balsan</i>	* 19.01.1922
	Agnese Terza	* 21.01.1931
	Paul Feichter, <i>La Ila</i>	* 25.01.1937
	y a düc chi co á santennom y compless i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns **cina le dedemesaledema** sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania
La Pli de Mareo
Santa Maria dal Bun Consei

Ploian: Signor Klaus Sottsas
E-mail: ploania@gmx.net

Calogna Al Plan: 0474 501006
Radio de Ploania: 93,00 MhZ

UNITÉ PASTORALA



Ann A

19.01.2020 - 2. domegna ia por l'ann

n. 8

Ciaréde l'Agnel de Dio!

☞ **Is 49, 3.5-6 | 1 Cor 1, 1-3 | Jan 1, 29-34**

Dal Vangelo do San Jan:


Te chel tomp ²⁹á Jan Batista odü le Signur co ti gnea pormez y al á dit: Ciaréde, l'Agnel de Dio, co tól demez le picé dal monn. ³⁰El é chel, de chel ch'i á dit: Do da me vegnel n el co m'é danfora, deach'al ea dan da me. ³¹Ince iu ne le conescea nia; mo i sun gnü y i baceii con ega, por ti al fá conesce a Ísrael. ³²Y Jan á testimonié: I á odü le Spirit gnenn jö dal ci desco na colomba y stenn sön el. ³³Ince iu ne le conescea nia; mo el, co m'á mené a bacé con ega, m'á dit: Sön chel che t'odaras gnenn jö le Spirit y sön chel ch'al stá, chel édl co bacieia con Spirit Sant. ³⁴Cösc ái odü, y i testimonié: El é le Fi de Dio.

Oraziun dal de

Periun! Dio onipotent, tö comanes sora le ci y la tera y t'as la potesté sora i cörs dla jont: porchel gnunse plens de creta da te; sosten düc chi co opereia por la iustizia y scinchi a nüsc tomps la pêsc.

Do cösc te periunse por nosc Signur Gejú Crist, to Fi, co é Dio y vir y regneia con te t'l'unité dal Spirit Sant por düc i secui dai secui. – Amen

(Lezionar A)



El é le Fi de Dio.

Jan 1, 34

☞ **Letöres dla 3. domegna ia por l'ann:**

Is 8, 23b – 9, 3 | 1 Cor 1, 10–13.17 | Mt 4, 12–23

Edema liturgica dai 19.01. ai 26.01.2020

DOM 19.	2. domegna ia por l'ann <i>Marius y 3 compagns, Heinrich</i>
08:30	gran messa por dōta la ploania <i>oferta por la ploania</i>
<i>10 y 18</i>	s.m. por †† Germano y Maria Frontull, Mareo s.m. a Al Plan
Lön 20.	<i>Fabian, Bostian, Elisabeta, Ursula</i>
<i>18:00</i>	s.m. a Al Plan
Ded 21.	<i>Agnes, Ines, Meinrad</i>
07:30	s.m. por † signor Matio Rigo, Matlogn s.m. en onú de San Bostian por la vijinanza de Brach s.m. por Nese y Florian Terza, André s.m. por † Anastasia Terza, André
Dem 22.	<i>Vinzenz, Walter, Teodolinda</i>
Jöb 23.	<i>beat Heinrich Seuse, Eugen</i>
19:30	s.m. por †† Hermann y Carlo Ploner, Corterei s.m. por vis y defonti dal Cargá s.m. por † Maria Rubatscher ved. Crazzolará, La Sala s.m. por la familia Rubatscher, Fornela
Ven 24.	<i>Francesch da Sales, Vera, Arno</i>
<i>07:10</i>	s.m. a Al Plan
Sab 25.	fiesta dla Converjiun de San Paul, Susanna
<i>18:00</i>	s.m. prefestia a Al Plan
19:30	s.m. prefestia por la fam. Georg y Caroline Rigo, Alnei s.m. por † Jan Maneschg s.m. de ringraziament a Santa Maria por la sanité s.m. de ringraziament ales animes dal purgatorio por la sanité
DOM 26.	3. domegna ia por l'ann festa de Sant'Ujöp da Oies <i>Timoteus y Titus, Paula</i>
08:30	Domegna dla Parora de Dio gran messa ciantada por la ploania en onú de Sant'Ujöp da Oies ♫ Cor <i>oferta por la ploania</i>
<i>10 y 18</i>	s.m. a Al Plan
<i>ampola:</i>	do intenziun de Paola Palfrader, La Pli
<i>ministronc:</i>	• da doman y domegna: Emma y Noemi • da sera y domegna: Lucia y Thomas
<i>i recordun:</i>	Lena Frena Brandlechner 19.01.2019 Florian Baldissera 22.01.2016



Ciaréde (Jan 1, 29–34)

I ponsi do


Jan ne bazila nia a reconesce te Gejú la presenza de Dio. L'agnel é simbol dla vitima inozonta co tól demez i picés dal monn. Ma te Gejú cialfunse cōsta salveza sterscia, radicala y completa. Ma a el podunse ti afidé nostes deblezes y ma da el cialfunse forza nea.

I preii ensciö

„Ciarede!“ T'es fora de nia atló, desco en ghest o en personaje conesciü. „Ciarede!“ Tö es la sorpresa por l'umanité. „Ciarede!“ Gejú, t'es tö chel, sön chel ch'an dess ciaré, le compagn da chel ch'an dess jí, le maester ch'an dess scuté sö, le Dio te chel ch'an dess creie. Te pöes en el desco düc, mo t'es unich y particular. Te ne damanes nia, mo te das döt. Al pö che te sii debl y delicat desco nos, mo t'es le su co é bun da tó düc i picés dal monn y da i desdrüje con la forza de to amur co se trasformeia te pordonn. I gnun da te: sen, tal meterman l'aventöra dla vita; en doman, canche i án le cör posoch; ala fin, canche i sun cherdés a dé jö cunt de döt. Mo i n'án degüna tema ciodi che i án conesciü te te, en compagn fedel, da coraji y da en bun cör. lolan!

Walter Cazzaniga, Parola amica – Il Vangelo della domenica per ragazzi

La storia dla Tor de Bábel cuntada ai mituns (2)



Plü ensö ch'ara va!

Nos porsones se confrontun: Che salta pa le plü debota? Che tira pa le salt plü lunch? Che davagna pa la partida al palé? Che é pa le plü gaiert? Che é pa le plü gran? Che sá pa da rospogne dert a plü domandes? Davagné é bel, cina che al romagn en jüch. Massa gonot endere é les porsones envidioses de ci che i atri á y é bogn da fá.

Belo dan trec mile agn proâ la jont da fá costruziuns plü altes co dōtes cheres co ea gnüdes fates cina enló. Plü gran – plü alt – plü cer, cōsc cuntâ, belo enlaota! Na te costruziun é la piramida de Cheops tal Egit co é gnüda fata sö dan presc 4500 agn. Ara é 150 m alta, plü alta co dōtes les atres piramides. Na costruziun tan maestosa tal desert fajea parüda ala jont – y le fej ince ciamó aldedancö. Dedô án spo costruí frabicac plü alc; le “Empire States Building” a New York é zonza antena 381 metri alt, i ciampanins jomelins a Kuala Lumpur tla Malaysia é 452 metri alc y a Taipei, la capitala de Taiwan, él en crazaci co mosöra 508 metri, plü de mez en chilometer!

Mo la costruziun plü alta al momont é le “Burj Khalifa” a Dubai tal Arabia: con sü 828 metri él dal 2008 encá le frabicat plü alt dal monn. Al é plü de 5 iadi tan alt co le ciampanin dal Münster (dom) da Ulm, tla Germania, co é 161,53 metri alt y porchel le plü gran ciampanin dal monn.